

# SIPA u Bobar banci FORMIRAN POSEBAN TIM ISTRAŽITELJA

**Očekujem da će na pravedan i krajnje odgovoran i profesionalan način obaviti posao, te vratiti novac onima koji su brutalno opljačkani, kaže Vučurević**

Pripadnici Državne agencije za istrage i zaštitu (SIPA) protekle sedmice počeli su izuzimati dokumentaciju koja se dovodi u vezu sa Bobar bankom iz Bijeljine, a u kojoj je pokrenut postupak likvidacije. Nezvanično, dokumentacija će biti izuzimana u Bijeljini, Banjoj Luci i Trebinju.

Kako nam je potvrdila Kristina Jozić, glasnogovornica SIPA, Agencija je primila naredbu Tužilaštva BiH za prikupljanje određene dokumentacije.

## Bez pojedinosti

- S ciljem što brže i efikasnije realizacije mjera i radnji navedenih u naredbi, formiran je poseban tim istražitelja SIPA. Po realizaciji planiranih mjera i radnji, SIPA će Tužilaštvu BiH dostaviti odgovarajući izvještaj. Konkretno pojednostiti u vezi sa realizacijom naredbe u ovom trenutku ne možemo iznositi, kazala je Jozić.

U Tužilaštvu BiH kazali su nam kako ne mogu dati nikakav komentar u vezi sa ovim slučajem.

Podsjećanja radi, likvidacioni upravnik Mile Maksimović je u martu izjavio da deponenti i povjerioci Bobar banke u likvidaciji potražuju oko 289 miliona KM, te da je od ukupnih potraživanja priznato 229 miliona, a osporeno 59 miliona maraka. Priznatih potraživanja Grad Trebinje ima 5,4, a distrikt Brčko 20,4 miliona maraka.



Oba grada su tužila banku i o svemu obavijestili tužilaštva BiH, RS-a i distrikta, te više međunarodnih institucija.

Gradonačelnik Trebinja Slavko Vučurević aktivnosti SIPA ocijenio je pozitivnim, kazavši kako je dobro da je neko konačno pokrenuo bilo kakve mjere.

- Iako je evidentno da se radi o organizovanom kriminalu, bilo kakve mjere do sada nisu bile poduzete. Pozdravljam angažovanost državnog Tužilaštva i SIPA. Očekujem da će na jedan pravedan i krajnje odgovoran i profesionalan način obaviti posao, te saopštiti šta se desilo, utvrditi krivce i dovesti sve one koji su oštećeni, kroz likvidaciju Bobar banke, do sredstava koja su im na

pljačkaški i brutalan način oduzeta. Mi očekujemo da će se to dovesti do kraja, kazao je Vučurević.

Dodao je kako je Trebinje zajedno sa distriktom Brčko i još nekim lokalnim zajednicama predložilo Međunarodnom monetarnom fondu da ne dozvoli aranžman Republici Srpskoj.

## Pokrivanje pljačke

- Očito je da bi to služilo za pokrivanje već opljačkanog. Znači, ovo se ne traži za unapređenje standarda i života građana, već za pokrivanje pljačke. To je suludo. Težnja bi trebala da bude na pomoći građanima RS-a i BiH, a ne da se novim kreditnim zaduženjem zadužuju svi građani u RS-u, kako bi

Page: 8

Reach: 0

Country: BOSNIA AND HERZEGOVINA

Size: 389 cm2

2 / 2

se pokrio kriminal organizovanih grupa koje su direktno pod patronatom aktuelne republičke vlasti, kazao je Vučurević.

On je naveo kako će se obratiti za pomoć Tužilaštvu BiH i SIPA za druge stvari, kao što je razotkrivanje prodaje kroz stečaj 3.000 kvadrata građevinskog zemljišta u blizini centra grada.

- Građevinsko zemljište je prodato u stečaju za 7.900 KM, odnosno kvadrat za nešto više od dvije KM, iako je cijena mnogo veća. Moramo vidjeti dokle seže ta hobotnica kriminala i možemo li zaista izaći pred sud javnosti i reći da ova država ima snage da se obračuna sa kriminalom, naglasio je Vučurević. **E. BARIMAC**

## Zarobljen i novac Zavoda za zapošljavanje

Na računima Bobar banke a.d. Bijeljina blokirana su i sredstva Zavoda za zapošljavanje RS-a od čak 12,3 miliona KM. Na ovu činjenicu skrenuli su pažnju revizori RS-a, u izvještaju o poslovanju Zavoda za zapošljavanje u 2014. godini, javlja Fena.

- Zavod je u 2014. bio izložen finansijskom riziku koji je proizašao iz uvođenja prinudne uprave 27. novembra 2014. i postupka likvidacije Bobar banke, gdje su na transakcionom računu posebnih namjena - projekat SSNESP i deviznom računu Zavoda za zapošljavanje blokirana sredstva od 12.311.638 KM, stoji u izvještaju Glavne službe za reviziju javnog sektora RS-a.

SSNESP je projekat podrške mrežama socijalne zaštite i zapošljavanju. Na osnovu prijave potraživanja od 16. februara ove godine, u Zavodu je izvršeno preknjižavanje blokiranih sredstava sa pozicije novčanih sredstava na poziciju potraživanja od Bobar banke u likvidaciji. Odlukom likvidacionog upravnika, od 20. marta 2015, Zavodu je priznato prijavljeno potraživanje od 12.311.638 KM.